



Reykjavík 25.09.2019

Borgarráð Reykjavíkur  
Tjarnargötu 11  
101 Reykjavík

Hér með sendist útskrift úr gerðabók skipulags- og samgönguráðs frá 25. september 2019 varðandi eftirfarandi mál.

### **Göngugötur 2019 - 2020**

Lagt fram bréf skrifstofu samgöngustjóra og borgarhönnunar dags. 23. september með tillögu um göngugötur 2019-2020.

*Samþykkt með sex atkvæðum fulltrúa Pírata, fulltrúa Samfylkingarinnar, fulltrúa Viðreisnar og Katrínu Atladóttur og Hildar Björnsdóttur, fulltrúa Sjálfstæðisflokksins. Eyþór Laxdal Arnalds, fulltrúi Sjálfstæðisflokksins greiðir atkvæði á móti tillögunni. Vísað til borgarráðs.*

*Eyþór Laxdal Arnalds, fulltrúi Sjálfstæðisflokksins bókar: Nýtt og umdeilt deiliskipulag vegna göngugatna er nýsamþykkt í auglýsingu. Vilji meirihluta rekstraraðila í miðborginni er skýr; þeir leggjast gegn vetrarlokun. Hér hefur ekki verið hlustað á þessi sjónarmið sem skyldi og sátt hefur ekki náðst og því greiði ég atkvæði gegn þessari afgreiðslu.*

*Áheyrnarfulltrúi Miðflokksins bókar: Fulltrúi Miðflokksins leggst alfarið gegn afgreiðslu nýs skipulags Laugavegs sem göngugötu og hagnar að ekki hafi verið haft samráð við hagsmunaaðila við ákvörðunartöku á fyrri stigum. Yfirlýsing borgarstjóra á fundi borgarstjórnar 4.sept. 2019 um að Laugavegur skyldi verða göngugata frá Hlemmi vekur sérstaka eftirtekt, enda myndi slíkt þýða að aðkoma að 200 stæða bílastæðahúsi Bílastæðasjóðs borgarinnar myndi lokast. Gerræðislegar yfirlýsingar sem þessi eru ekki merki um að samráð og sátt sé ofarlega á baugi hjá borgarstjóra enda hefur nú verið ákveðið að svara í engu fjölda athugasemda og undirskriftalistum er málið varða. Yfirlýsingar eins og „Okkur er alveg sama hvað fólk vill, við ætlum að gera þetta.“ þóttu kannski boðlegar á miðöldum en eru það sannarlega ekki á 21. öldinni. Sá misskilningur virðist hrjá meirihlutann með borgarstjóra í broddi fylkingar, að í síðustu kosningum hafi hann fengið umboð borgarbúa til að framfylgja vilja sínum, en ekki þeirra. Krafa er að raunverulegt samráð verði haft við hagsmunaaðila og borgarbúa. Fáum upp á borðið hver vilji þeirra er áður en lengra er haldið. Það er farsæl leið. Það er rétt leið. Fulltrúi Miðflokksins hefur ekkert á móti göngugötum, en setur kröfu um að slíkt sé gert með sátt og samráði.*

*Kl. 13:28 vikur Eyþór Laxdal Arnalds af fundi.*



Reykjavíkurborg  
Umhverfis- og skipulagssvið

F.h. umhverfis- og skipulagssviðs

*Glóey Helgudóttir Finnsdóttir*

Glóey Helgudóttir Finnsdóttir

Fylgiskjal: bréf skrifstofu samgöngustjóra og borgarhönnunar dags. 23. september 2019.



Skipulags- og samgönguráð

Málsnúmer: USK2019040026

23. september 2019

## Göngugötur 2019-2020

Lagt er til að eftirfarandi götur verði göngugötur frá 1. október 2019 til 1. maí 2020.

- **Laugavegur** frá Klapparstíg að Ingólfsstræti.
- **Skólavörðustígur** frá Bergstaðastræti að Laugavegi.
- **Bankastræti** frá Skólavörðustíg að Þinghóltsstræti.

Götur verða opnar fyrir akstur vegna vöruafgreiðslu kl. 07.00 til 11.00 virka daga og kl. 08.00 til 11.00 á laugardögum á tímabilinu. Önnur umferð ökutækja er óheimil á svæðinu á göngugötutímabilinu og allar bifreiðastöður einnig óheimilar.

Göngugötur verða merktar með B01.11 og tilheyrandi undirmerkjum.

### *Greinargerð*

Unnið er að undirbúningi þess að gera hluta Laugavegar og aðliggjandi gatna að göngugötum allt árið í samræmi við samþykkt Skipulags- og samgönguráðs frá 3. apríl 2019.

Fyrsti áfangi sem nú er í deiliskipulags- og forhönnunarferli er Laugavegur milli Klapparstígs og Ingólfsstrætis og Skólavörðustígur milli Bergstaðarstrætis og Laugavegar. Gert er ráð fyrir að deiliskipulagið verði afgreitt á fyrsta ársfjórðungi ársins 2020 og að það taki gildi fyrir 1. maí.

Fyrir hönd skrifstofu Samgöngustjóra og borgarhönnunar

Þorsteinn R. Hermannsson  
Samgöngustjóri

